

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matabiti hoê.

Nu. 11.

Novema 1929.

Mat. 23.

*"Ia tae to Oe ra hau. Ia haapaohia to oe hinaaro i te
fenua nei, mai tei te ao atoa na."* (Mataio 6:10.)

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo
tei papaihia e Tamate Aposetolo; Faaauhia ei reo Tahiti e Elita.

*HIRO'A FAAROO 10. Te faaroo nei matou * * * **

*E e parahi tino mai hoi te Mesia ei arii i nia iho i te fenua
nei.*

(E tuatiraa teie nei parau.)

TO IESU ARIIRAA I NIA I TE AO NEI.

UIRAA 5. E mea nahea to Iesu ariiraa i nia i To'na ba-
sileia nei?

P. Na roto i te mau parau papai ua ite tatou e, e tae
tino mai te Mesia i roto i To'na hanahana. Ei reira e riro
ai Oia ei Atua e ei Arii no te Feia Moá. E faatere Oia i te
hoé hau mai te parau-tia e te patoi-ore-hia, e e ô te mau
hau atoa no te ao nei i roto i taua basilea rahi ra.

Parau Tauturu: Ua î roa te mau parau moá i te parau no To'na ariiraa. Ua na ô maira Mose e, "Ei ia Iehova te hau e a muri noa'tu." (Exodo 15:18) Ua na reira atoa maira Davida i te na ôraa mai e, "O Iehova te Arii e a muri noa'tu"; (Salamo 10:16)

Ua tatara Daniela i te moemoeearaa o Nebukanesa e i ta'na parau no te mau basileia e faatiahia, ua tae mai oia i te hoé ahuru basileia i faaauhia i te tapuae i reira to'na parauraa mai e; "Ia tae i te anotau o taua mau arii ra, e faatupu ai te Atua o te raí ra i te hoé basileia, o te ore roa ia e mou, e ore roa hoi e riro ia vetahi ê; e hope roa hoi taua mau basileia ra i te parari e e pau, e vai tera e a muri noa'tu." Daneila 2:44)

Te faaite mai nei Iehova i te mea ta'na i te na ôraa mai e: "Ua faaoto maira te toohitu o te melahi i ta'na e e mau reó rarahi atura tei nia i te raí, i te na ôraa e, O te basileia ra o teie nei ao ua riro ei basileia no to tatou Fatu e no ta'na ra Mesia, e e vai ia te hau ia'na e a muri noa'tu." (Apokalupo 11:12)

Uiraa 6. Eaha na huru auraa e piti i parauhia no te *Basileia*?

P. Tera mai ia te pahonoraa:

1-Ta'na Ekalesia, oia hoi ratou o te pee i te Mesia.

2-Te Basileia e aore râ te hau Ta'na e faatere ia tae mai Oia i te mau mahana hopea ra.

Parau Tauturu: I roto i te Evanelia a Mataio ua parau-noa-hia "te Basileia o te ao ra"; i roto râ i te evanelia na te tahi na aposetolo ua parauhia ia te "basileia o te Atua" e te "basileia o te Mesia". No reira ua tauinoahia te reira na I'oa e i te tahi mau taima ua parauhia te Ekalesia i te "basileia o te ao ra", e i te tahi taima te "basileia o te Atua", no reira ia hiópoa-maitai-hia te auraa mau e tia'i.

Ia parau tatou no te basileia i roto i te piti no to'na au-

raa, oia hoi te huru no to Iesu ariiraa, ua ite papu tatou e, e ô atoa te Ekalesia i roto. No te mea ua faatiahia te Ekalesia e e vai â oia i roto i te tau mahanahana a tae mai ai Iesu i te ao nei.

I roto i te mau parau heheuraa no teie nei anotau ua faataa-maitai-hia te basileia no te ao ra e te basileia no te Atua. Te Ekalesia ia te auraa no te basileia o te Atua, e te ariiraa no Iesu i nia i te ao nei ia te auraa no te basileia o te ao ra. No reira ua faatiahia te basileia o te Atua na roto i te faatiaraa a te Ekalesia a Iesu Mesia i te Feia Moá i te Mau Mahana Hopea Nei.

I te taime e tae hanahana mai ai te Mesia, e peehia Oia i te feia parau-tia o tei ora na i nia iho i te ao nei, ei reira atoa e ravehia te feia parau-tia no te ao nei i roto i to'na hanahana, ei reira atoa Enoha e tae mai ai, e e farerei hoi te basileia o te ao ra i te Ekalesia mai te faatiahia i nia iho i te ao nei. Ei reira e faaîhia i te pure o tei na ô mai e, "Ia tae ta oe ra hau, Ia haapaohia to oe hinaaro i te fenua nei, mai tei te ao atoa na." (Mataio 6:10)

Uiraa 7. Ua faatiahia anei te basileia o te Atua i nia iho i te fenua nei?

P. Mai te mea e farii tatou i te auraa no te basileia o te Atua ei Ekalesia, ua tae roa te pahonora e, ua faatiahia te reira. No te mea, ua faatiahia te Ekalesia a Iesu Mesia i teie nei mau mahana; e ua maitihia to'na ra mau taeae faatere. Aita râ ratou i mau i te mana no te faatereraa i te mau hau no te ao nei, mai ta Iesu e mau i To'na taeraa mai.

Parau Tauturu: Mai ta tatou i ite ua hau rahi te basileia o te ao ra i te Ekalesia. E farii te feia maitai e te parau-tia atoa no te ao nei, i te meloraa i roto i taua basileia ra, noa'tu e, e mau melo ratou no te ekalesia e aore anei, area râ te to te Ekalesia anaé te mana faatere e te mau haamaitairaa atoa e au ai.

Uiraa 8. Eaha ia te Meleniuma?

P. Te reira ia te i'oa i topahia i nia iho i te area a ta-peahia'i Satani, e a ora'i Iesu i nia iho i te ao nei i roto i To'na mana mai te hau e te peapea ore, no na matahiti e hoé tausani ra.

Parau Tauturu: I ta tatou haapiiraa'tu i te meleniuma, ua taió noa tatou i te parau no na matahiti e hoé tausani ra; eiaha râ tatou e manaó e, ei reira te hopea no ta'na mana e to'na ariiraa i nia aé i te taata. Area râ e mea huru ê taua taime ra i te tau na'mua e te tau na muri i te reira. Te na ô maira Ioane e: "Ua haru ihora oia i te teni ra, i taua ohipa tahito ra, oia hoi te diaboló ra, o Satani, ua ruurnu ihora ia'na e ia hoé tausani i te matahiti. Ua huri atura ia'na i raro i te abuso ra, ua opani atura i te opani ia'na, tuu ihora i te tapao i nia ihora, ia ore oia ia haavare faahou i te mau fenua, e ia hope roa taua na matahiti hoé tausani ra; e i muri aé i te reira; ia tuu-iti-noa-hia'é oia e tia'i. E ua ite au i vetahi ê mau terono ra, e te feia i parahi i nia ihora; e ua horoahia te mana haava ia ratou; e ua hió atura vau i te feia i tapuhia to ratou upoo no ta ratou faateiteiraa i te parau ia Iesu, no te parau a te Atua ra, o tei ore ia i haamori i te puaa e to'na ra hohoá, e ore hoi i farii i ta'na tapao i nia i to ratou rai e i roto i to ratou rima; parahi ihora ratou i ô te Mesia ra ma te hau atoa, e hoé aéra tausani i te matahiti. Area te tahi pae o te feia i pohe ra, ia hope taua na matahiti hoé tausani ra i ora faahou ai. O te tia-faahou-raa matamua hoi te reira." (Apokalupo 20:2-6)

Ua faaite atoa maira Isaia i te mau huru-ê-raa e vai i taua taime ra: "E ore e itea te aruaru i mure noa te aho i reira; e te taata paari ore i hope maitai to'na pue mahana; o tei tae i te matahiti hoé hanere ra a pohe ai ra, e parauhia ia o te tamaiti iti; e te taata rave hara tei tae i te matahiti hoé hanere ra; e parauhia ia, o te tuhihia. E patu ratou i

te fare, e na ratou iho e parahi; e na ratou e tanu i te ô vine, a amu ai i te maa i reira. E ore ratou e patu, e na vetahi ê e parahi; e ore ratou e tanu, e na vetahi ê e amu; mai te mau mahana o te raau nei te mau mahana o to'u ra mau taata, e vai taiata te aho o to'u ra feia i maitihia i to te mau mea ta ratou i hamani. E ore hoi ratou e ohipa faufaa ore noa e ore ratou e faafanau i te tamarii pohe noa; e tamarii hoi ratou na tei haamaitahia mai e Iehova; ratou, e ta ratou atoa ra mau tamarii. E riro hoi, hou ratou e tiaoro mai ai, te faatia ra vau; e te parau noa maira ratou, te faaroo ra vau. O te luko e te pinia mamoe hoé â amu-atoa-raa; e amu hoi te liona i te aihere mai te puaatoro atoa ra; area te ophi ra, o te repo ta'na maa. E ore ratou e hauti, e aore roa e maa e pohe ia ratou, i tau mou'a moá atoa ra e ati noa'é, te parau maira Iehova''. (Isaia 65:20-25)

I roto i te matahiti 1831 ua faaite maira te Atua i te parau e, "E tae mai hoi te Meleniuma rahi ta'u i faaite na te vaha a to'u ra mau tavini; e tapeahia hoi o Satini; e ia tuu faahouhia oia ra, e tau iti poto roa to'na hauraa, i reira e taeahia ai te hopea no te fenua nei''. (Buka Fafau 43: 30-31)

No reira e tae mai te meleniuma na mua i te hopea ra. I roto i taua na matahiti ra a tapeahia'i Satani, e ora maitai ia te mau taata mai te raveraa i te ohipa parau-tia. Noa'tu ra te reira, e vai atoa ra te hara e te mau hapehape rii, e aita hoi te pohe e ore maori râ e ora te tamarii e tae noa'tu i to'na paariraa ei reira oia e faahuru-ê-hia'i. E ora te taata tahuti e te tahuti ore i nia iho i te ao nei, e e nehenehe ia ratou ia parau i to te raí. Te faaroo atoa nei te Feia Moá e, e faatiahia ia ratou i te rave-noa-raa i te ohipa no tei pohe mai te tauturuhia e to te raí.

(Tuatihia teie nei parau.)

Te Tufaa Ahuru

“No Iehova te fenua e te i atoa i nia iho; te mau fenua o te ao nei, e te feia atoa e parahi i reira.” (Salamo 24:1.)

No vai to oe fare, no oe anei? Ta tatou mau faufaa'toa, e ere ia na tatou, ua pirihia ra ia tatou. Te vai ra ta tatou contract i te Atua. Tatou tei bapetizohia, tatou tei amu noa i te oroa, o tatou ia tei ofati noa i te faaueraa a te Atua. “Oia ia, te mau mea'toa no te ao nei, i to'na tau i to'na tau, i to'na vahi i to'na vahi, ua hamanihia na te taata, e ei mai-tai na te taata, ia mauruuru te mata e ia faaoaoaite aau. Oia ia, ei maa e ei faaahu, ia amuhia e ia hoihia to'na haua, ia faaetaeta i te tino e ia faaitoito i te varua. Ua mauruuru te Atua ia horoa oia i teie mau mea na te taata, i hamanihia ratou ia ravehia ma te feruri maite ia ore ia faarahi e ia ore ia hape. Aita atu e tumu e faariri i te Atua, e aore ra aita atu e taata e ririhia e te Atua, maori ra e, o ratou tei ore e fai i te rima o te Atua i roto i te mau mea atoa ra, e o tei ore e haapao i ta'na mau faaueraa.” (B. F. 59:18-21.) Ua oti nehenehe roa ta te Atua tufaa no teie faaauraa. Ua oti te mau mea i te hamanihia na te taata. Tei roto i to tatou rima, ei faufaa na tatou. Area ra, a haamanaó tatou i te parau i roto i te Deuteronomi 8:18, o te na ô maira ia tatou nei, “e haamanaó ra ce i to Atua ra ia Iehova, na'na hoi i horoa mai i to oe itoito e noaa'i ta oe taoa.” Eiaha tatou e manaó e, no to tatou iho puai e to tatou iho paari i noaa'i te mau mea no te ao nei. E parau mau roa te reira parau tei na ô mai ia tatou e ua hamanihia te mau mea na tatou, ia ravehia ra ma te feruri maite e te hape ore. A haamanaó atoa tatou i te parau tei na ô mai e “aita atu e tumu e faariri i te Atua, e aore ra, aita atu e taata e ririhia e te Atua, maori ra e, o ratou tei ore e fai i te rima o te Atua i roto i te mau mea atoa ra, e o tei ore e haapao i ta'na mau

faaueraa''.

Ia taió outou i te parau, a rave i te Bibilia e hió i roto i te Malaki 3:8-10. Mai te mea ua oti te reira i te taióhia, ua papu aita i vaihohia ia tatou ia imi i ta tatou iho tufaa no teie faaauraa. E te faaite atoa mai te buka toru ra no Mose, "E te tufaa ahuru atoa ra o te fenua, to te huero o te fenua, e te maa atoa no te mau raau ra, na Iehova ia." Ta te Atua tufaa no teie faaauraa, o te horoaraa ia no te mau mea no te ao nei i roto i te rima o te taata nei. Ta te taata ra tufaa, o te faahoíraa mai i te hoé tufaa ahuru no ta'na mau faufaa atoa no ta Iehova mau ohipa ra. I te taime tatou i bapeti-zohia'i ua riro tatou e mau melo no te Ekalesia e ua farii tatou i te mau tnre i roto ra. Ia papaihia to tatou i'oa i roto i te mau buka no te ekalesia ua au ia i te papairaa no to tatou i'oa i raro ae i te hoé parau piriraa fenua. Ia ofati tatou i te hoé parau piriraa fenua, ua nehenene ia faautuahia tatou e te hau. Hoé anaé huru ia ofati tatou i to tatou faaauraa i te Atua ra. Te vai ra ia te mahana e faautuahia te taata o tei faariri i te Atua mai te ofati i ta'na mau faaueraa.

Ua Eiaha ra e manaó e, te tamata nei teie mau parau i te faahepo noa ia outou no te aufauraa i te tufaa ahuru. Te hinaaro nei ra vau ia haapao outou i teie parau no ta outou iho titauraa i te mau haamaitairaa no o mai ra i te Atua.

Papaihia e Mati

Te Atua Ite-ore-hia

I te taime i parauhia nei, oia hoi, e piti ahuru matahiti i muri ai i te tia-faahou-raa o te Mesia, te faaea ra Pauro i Ateno ma te tiairaa i te tahi na taeae no'na ra.

Te tupu atoa ra te Ekalesia i te rahiraa i rotopu i te Ati Iuda e te Etene atoa hoi. Tei roto atoa te mau taata veve e te mau taata taua rahi e te roo rahi atoa hoi. Te tahi pae

o te Ati Inda o te ore i faarii i te evanelia a te Mesia, o ratou ia te mau taata o tei faatupu i te peapea no to te Ekalesia, no te mea, te tiaturi noa ra ratou i te ture a Mose e aita ratou i faarii i te ture a te Mesia.

To Pauro ra hoi tiairaa ia raua i Ateno, i a'era to'na varua i te aroha i to'na hióraa'tu i taua oire ra, ua i roa i te idolo. E mea itoitoe oia i te pororaa i te Evanelia i te mau taata atoa i te mau vahi atoa, oia hoi te parau no Iesu e to'na tia-faahou-raa. Ua maro maira ia'na e toofanu mau philosopho Epikuro e te Setoiko; ua na ô a'era hoi e toofanu, "E nahea maira teie nei taata iti raveauru ia parau mai." Ua rave a'era ratou ia'na, aratai atura i te Areopago, e ua na ô maira, "A faaite mai ia matou i tena na parau api ta oe e haapii na. E parau huru ê hoi ta oe e hopoi mai i to matou tariá, te hinaaro nei matou ia ite i taua parau na i te huru."

Ua papu ia tatou e, te huru o teie nei feia, aore â hoi to Ateno atoa, e te taata ê e parahi i o ratou ra e ohipa, maori ra o te faaroo e te parau i te parau rii api, e no to ratou iho hinaaro ia faaroo i te parau api, ua faatia a'era ia'na ia parau ia ratou ra.

Ua tia a'era Paulo inia i rotopu i te Areopago, na ô atura, "E te mau taata Ateno nei, e rahi hua to outou mataro i te demoni, ua ite iho nei au. Ia'u hoi i hahae noa iho nei e te hió-noa-raa'tu i ta outou e haamori nei, ite atura vau i te fata e te parau papaihia i nia iho, NA TE ATUA ITEA ORE. O ta outou hoi e haamori noa nei ma te ite ore ia'na, oia tau e parau atu ia outou nei. O te Atua i hamani i teie nei ao, e te mau mea atoa i roto ra, te Fatu o te ra'i e te fenua nei ra, aore ia i parahi i rotó i te hiero i hamanihia e te rima taata nei. Aita ana faufaa i noaa i te rima taata mai te mea e, i toe te hoé mea iti ia'na, oia iho hoi tei horoa mai i te ora, e te aho, e te mau mea atoa nei, na'na i hamani i te taata i te fenua atoa nei i te toto o te taata hoé

ra, ei parahi i te mau fenua atoa nei, e ua haapao i te tau i haapaohia i mutaa ihora, e te otiá o to ratou ra parahiraa; ia imi ratou i te Fatu peneia'e o te perehahu atu ratou ia'na e itea'tu, aita ra oia i atea ê atu ia tatou atoa nei; no'na hoi to tatou ora, e i hahae ai, e i parahi ai hoi; mai te vetoo-fanu o to outou mau rohipehe i parau maira e, "E tamarii atoa tatou na'na".

E tia roa ia tatou atoa nei ia feruri i nia i teie nei vahi. TE ATUA ITEA ORE. Te vai ra te mau haapaoraa i reira, i Ateno e i Roma atoa hoi, aita ra teie mau taata i mauruuru i tereira, no reira ua hamani ratou i te hoé buka e ua papai ratou i taua mau parau ra i nia iho, TE ATUA ITEA ORE. Ia Paulo ra aita atu tumu parau i hinaarohia e ana, maori ra te reira, e ua aó oia i te Evaneria ia ratou mai ta tatou i faaroo a'enei. Ua atahia oia e te pae rahi o taua mau taata ra, ua faaroo ra te tahi pae.

Hoé â huru i te mau taata i teie nei anotau a faaroo ai ratou i te huru mau o te Atua mai te haapiihia e te Ekalasia a Iesu Mesia i te Feia Moá i te Mau Mahana Hopea Nei. No reira e tia roa ia outou e ia tatou atoa hoi ia ani ia tatou iho, UA ITE ANEI AU I TE HURU MAU O TE ATUA.

Papaihia e Gihoti Borobiti

"E tuatihia teie nei parau"

Te Mau Parau Api

E TARAHU API

Ua papu ia tatou e, e topa te taata i roto i te tarahu: ua tae mai ra te hoé parau api ia tatou nei no o mai i te fenua Amerika. E uri ta te hoé vahine i reira, e e peu ino roa ta taua uri ra, oia hoi ia tupu to'na poiaraa e haere oia i te

fare hoo inai e haamata oia ia maniania e e na reire noa oia e tae roa'tu i te taime i faaamuhia oia e te taata tapu inai. Te aufau nei ta'na fatu i ta'na tarahu i te hopea o te avae. E uri ite hoi teie.

AIU PITI

I te hoé tufaa fenua i te hitia o te ra i te fenua ra Amerika ua itehia te hoé tamaiti e 17 to'na matahiti e ua tae to'na faito i te 200 kilo. E tamaiti itoitō ra oia e te puai atoa hoi. Te riaria roa te mau taata haapao ore ia'na no to'na puai. Te parau mai nei oia e, ua hinaaro oia ia riro ei taata ivi, aita ra e ravea, no te mea ua haapae oia i te maa e te tahi mau mea e te tupu noa nei oia i te poriaraa. O Arthur Wolf ia to'na i'oa.

UA TUPU TE HOÉ TOHURAA

Ua tupu te hoé tohu o tei tohuhia i te matahiti 1831. Na roto i te faaotiraa o te fare pureraa i te oire Cincinnati ua tupu te hoé tohu i tohuhia e te Peropeta Iosepha Semita e iva ahuru ma vau matahiti i mairi aénei. Ua tae te hoé aposatolo i reira, o Orson F. Whitney to'na i'oa, e e tufaa ta'na i te tomoraa o taua fare pureraa ra. Te faaite maira oia e, te tupu nei te ohipa a te Fatu i reira, e mea itoitō te mau taata no te Ekalesia i reira, e na roto i to ratou itoitō, ua oti nehenehe roa to ratou fare pureraa, e te rahiraa o te moni i pau no te hamaniraa, e 150,000 dala moni Farani ia. I te 25 no Setepa i faaotihia'i teie fare. Ua etaeta te mau taata i taua oiré ra i te matamua, i teie nei râ ua haamata ratou i te faarii i te mau haapiiraa a te Ekalesia.

E ATI NO TE PAHIREVA

Ua tere te hoé pahi reva i roto i te hoé vero rahi, e aita ratou i ite i te hoé mouá, e ua tano to ratou pahi i nia i te hoé raau teitei, e ua huri te pahi, e ua topa i reira, e ua ama

ihora i te auahi e ua paapaa te pahi e te mau taata atoa hoi, hoé vahine, e e hitu tane, ua pohe roa ratou. E mea maoro aita i itehia teie pahi reva, e hitu mahana ia, i reira, ua tae te hoé pahi reva i tera vahi e ua itehia te hoé vahi uouo e te mau raau paapaahia i reira. Ua hoi atu te pahi reva i te tapaeraa pahi reva e ua faaitehia te mau taata i reira. I te reira ihora taime, ua haere ratou na nia i te pereoo uira e te mau puaahorofenua i taua vahi ra, e iva ahuru maire ia te atea, e 10,000 avae i nia i te mou'a. Ua rave ratou i na tino pohe e ono, e ua vaiho ratou i na tino e piti, no te mea, ua paapaa roa raua.

TE AUEUE FENUA I VAIHI

I te mau mahana hopea o Setepa nei, ua faaroo te mau taata i Vaihi i te harururaa e i muri iho ua ite ratou i te fenua i te aueueraa, e hitu mahana ia te aueueraa, e ere râ te mau aueueraa rahi e mea taamau noa râ, e ua parau te tahi mau taata paari i reira e, e tapao faaite ia ua ineine te hoé mouá ia piháéi te auahi. E rave rahi te mau taata faaapu mamoe i taua vahi ra, pihai iho i te mouá, e te faaineine ratou ia afai i ta ratou mau mamoe i te tahi vahi ê. Te i'oa o teie mouá auahi ra, o Hualalai ia e ua parauhia e to Vaihi ra aita teie mouá i pihae mai te matahiti 1801 e tae roa mai i teie nei taime, e ua manaó ihora ratou e, ua pohe oia.

E ATI RAHI

E ati rahi tei roaa i te tahi mau taata i te oire Detroit i Amerika i te hoé fare arearea o te paapaa i te auahi. Te inu ra ratou i te ava e ua taero te tahi pae. Ua tamata te hoé taata i te taura i ta'na avaava i rapae ite haamaramarama e aita ra i tae, ua topa ra i nia i te tahua pihaiho i te tahi parau, e ua ama ihora, e no ta ratou taero, aita ratou i hió. E hoé ahuru tane e e pae vahine tei pohe roa i roto i taua fare ra.

FAATURARAA INIDA

I te avae Setepa i mairi aénei na faataa te hau Amerikai te hoe mahana ei mahana faaturaraa no te mau Inidia i taua fenua ra. No te mea, no ratou ra taua fenua ra. A tae ai te mau papaa i Amerika i te matamua roa, te parahi ra te mau Inidia i reira, e na roto i te mau huru tamaí, ua riro te pae rahi o taua fenua ra i te papaa. Te faaherehere nei te hau Amarika ia ratou i teie nei, e ua horoahia te tahi mau tufaa fenua maitai roa na ratou ia nehenehe ia ratou ia faaapu i te mau mea i hinaarohia e ratou ra. No reira, ua manaó te hau e, e mea tia roa ia faataa i te hoé mahana ei faaturaraa no ratou, e i taua mahana ra, ua opanihia te mau fare hooraa atoa, e te mau fare rave ohipa hoi.

TE FEIA API I PAPEETE NEI

I te avae i mairi aénei ua haamatahia te ohipa na te feia api i Papeete nei. Ua maitihia Tahiri â Toriki ei Peretiteni no te mau tane e ua maitihia Hiriata â Tehiva ei Peretiteni no te mau vahine no te feia api, e ua maitihia Huri â Huri ei papai parau. Teie ta ratou ohipa, oia hoi ia faatere i te mau haapiiraa i te mau po Sabati atoa e tahi atu â mau ohipa manaóhia e te feia api.

TE PEREOO RADIO

Te faaite mai ra te hoé Sotaiete i Amerika, oia hoi te General Motors Company, te haamata nei ratou i te tuu i te radio i roto i te tahi mau pereoo uira i hamanihia e ratou ra. Ua hoo ratou i te hoé fare rahi o te hamani i te radio i teie nei. Ua parau mai ratou e no atu te vahi e haerehia e te taata e to'na pereoo e nehenehe noa ia'na ia farii i te parau api e te mau himene atoa hoi.

M. Bonnet M. Gerant et Imprimeur,

Rue Brea et de la rue Dumont d'Urville, Orovini, Papeete